

# Ahañaab son akoñaool Jígoosoor

Ahañaab et sa femme Djigosore

Texte  
Abib SADIO

Illustrations  
Abdoulaye Madior SAGNA

GIE CLOA  
Thionck-Essyl  
Département de Bignona  
Région de Ziguinchor  
Sénégal

SIL  
BP 2075  
10200 Dakar  
Sénégal

# Ahañeñaab et sa femme Djigosore

Langue : gusiilaay

Sénégal

Afrique de l'Ouest

Première édition

2016

© GIE CLOA 2016

© SIL 2016

*Degoo-dego*

*Dego-mandinj*

*Jaa gurokee*

*Eeh*

Ahañeñaab son akoñaool Jígoosoor, funak fucee ngujae gasaaf apaaliil Gábaam. Nan gutiiñan mee jaram tijon ngulob bóot. Gábaam nalobiil, nípurenuul gafuga. Nan gujow mee jaram gujoonoor furemiil fuñaa, nalobiil nirehuul taahe. Bare, jambil jirem n'furem fammee m'bulaago. Gáriilo gammee gáriilo sah jambil jikaan. Fuñaañaao.



Nan arehiil mee abaañ, Ahañeñaab náciben akonaool Jígoosoor nak gulob bo ngujow. Ahañeñaab nalobe mee n'akoñaool, mo nammee ngakaho. Jígoosoor ámirut mara arañool akahoekaho. Nalob bo noonool jaram ánif, arañool ásuuput. Nawook, nníf náruten nníf, najeg añout an. Tooge min awuuje furem faafu. Ahañeñaab áriiloriilo n'furem faafu afaak. Nátiij gateylenool n'gayaañen nu mo ró. Furem faafu ngulobolaal mee fuñaañaao'oowoh jambil urem.



Jandiŋ átiŋ, natoogool min areme afaak.  
Naliimool awook manooman átuulut. Nsehoon  
furem faafu fuñaañoaao. Nateb guñenool abar  
fukow nakaaw.


Narok : « Ahajeñaab tanaool peepe, íyahe.  
Aahe marem dáare. Jaat bo be eregool, ho abil  
mee elob bugan set waa wommee ñaañoaao. »



Jígoosoor nañes arañool n'futañaat faafu jaram guyahool gufaago, añoutool. Wanoowan wan añow dó, nasonken wo.

Nulobool : « Iñout an baabe haani gawel goola sah ajamut go. »

Nalabañ galako min apinoor min abil mee ekaan. Najok mara bátuuher baabu bammee dúniye búroom bo peepe banooban bujanjaam. Bare an arege bo sipehe.




Napinoor to apinoor, nawosen umaañen ubugu dó n'esugiil gomma gubaagiir. Anooan, awunwuŋ fukow.

Narok : « Nemma Jato, ho guroge n'etut karamba nabaji, nabaagoor son sijato. Nájuh futiik naŋ so. Ho ájuh mee aŋesomool n'eramba yaayu. Mbil eeno jaat umu dóoru n'furem faafu násiime, Jim ho may nu mal nabaage. Neeni apak aloh nu mal cúm, aw be erok jicaaŋen fannajo. Ipúr to, niwook Ira. Ho may neeni saaho túgunti, be éyiit. Angá, ho neeni n'etaam nafogenoore, ho be éfogulool. Jícil nabaje jibaabaak jiyok. »

Nan apinoor mee mara uŋesa araaŋool jaram ajok ubuge, nawooguliil bu to n'furem faafu. Min alobiil wabajool to mee.

Narogiiil : « Injé éli n'araanom nútiingulo taahe, náriilo dóoru, naat marem dó. Teer apaalool Gábaam alobólibob jambil urem dó n'furem fammee m'bulaago. Ho nabalaŋ náriilo. Maa naliimaam maa maa. Ñeer iŋeeŋees kábiriŋ fugen jaram tikahen iñoutool. Ikorikori tan eem maa maa. Aaraanom an abaje fubaj faŋ bo n'ésugoli icamenut apagom. Ñeer año'ool mee, be ecaamool dó n'fubaj faafu. »






Nan guyisoor bu funjes faafu. Jígoosoor nájiki narok : « Jaat fok iño'ool mabaagiiriil ñeer mat gúbaañul bañoutool ? Haani Atúuha mat akaan mo. »

Nan gujow mee nja gúbaañul, Angá nalobool : « Sitaam futok n'síruba saasu ifaafaak so, alet dó. »

Jim nalob : « Gurem gaagu gara ésuk ye peepe nimojoore, alet dó may. »



Narok : « Ira, aw básiheri ubu,  
bunoogoonoogoor naṅ ukeseuloot may ? Mara  
úbañaaliulobaañaali tambi. »

Jígoosoor alobeool mee mee.

Ira narok : « Injé uñow mee íbaañaaliul,  
iñoulooñow n'fataam bumangaylen nalakoe.  
Neeni írooken be eño'ool. Min iwaloúl jaram  
ijooṅoor bumangaylen baabu, naliimom. Ecil  
mee níbaañaaliul min nubehooraal (upinooraal  
nubilaal mee ekaan). »

Jígoosoor nayuhó búruk !

Narok : « Urege buu ? Béy bumagaylen ? Béy  
nu bo ? Ujaal nuliigom bo. »

Narogool : « Let taahe kuhikuhi. »

Angá narogool : « Uṅaroom nubaaña ínje mat  
aliimom. »

Ira narogool : « Erús yaamee dóoru fatiya  
eruruuk máamak. Mat újuh eñeer sah. »

Angá narogool : « Injé be efoon síñunduom.  
Mat siyogenom. »

Jígoosoor narogool : « Utebool, utebool mat  
eyogenool jijow. »

Nan gúyiit mee jaram gútiṅ, Ira narok :  
« Angá, ummae uñoñow ? »

Angá narogool : « Eem iño'ooñow. Ñeer uwalo  
dó nu bo. »

Nan gujow mee jaram gujoonoor bumangaylen  
baabu, Ira narok : « Aliime. »

Angá narok : « Umu to atosut ironje neño'ool.  
Ukot dó. Ngukot dó n'gawulena. Angá nawalo  
káj atogool to. »

Nemma narehoore namundum awoogool  
n'sembe « Ahañeñaab ! » Návollo.

« Ay arogi ínje gajaom mee ? »

« Akoñai úmu nfunesi kábiring fugen. Aw nulako taahu uwaayen mee. Uyuhoúl nuja'aal bóot. »

Ahajeñaab : « Eem maa maa íjuhut ilako'oor son bugan. Mara ikaanut maareer an. » Ira mulakoenaay min ajanten Angá, naat.

Ahajeñaab narogool : « Injé furem ngurogólí baabu fuñaañoñaa nibuuy akoñaom níriilo irem dó. No ninogoor maa maa. »

Angá narogool : « Ñeer gasiin gammee n'fukoi ? »

Narogool : « Uge, waafom peepe dó wommee. Neeni gúpur fufunak ínje be ecet. »

Angá abaj feere bu nu ho. Narogool : « Aw ñeer marem neeni mutiñi tuu nubile marem ? Mara ijegoojogoor taahe manooman iñout ekolonj. »

Ahañeñaab narogool : « Furem fan iremulo mee fara síndo. »

« Ñeer ewaato yéy nak jijow bo marem ? »

Ahañeñaab narogool : « Bunak baliñer tiñ, son fitiro, n'etuut ufuk. »

Angá nalobool : « Injé ñeer bóot ticancañ. »

Nan Angá nan átiñ mee n'furem faafu,  
Jígoosoor nátiñ gayuhoúl búruk : « Uméy ?  
Angá úmey ? Ahañeñaab úmey ? Gurege  
jiño'ooñow ? »

Narogool : « Eem iño'ooñow bare let  
Ahañeñaab hara fugen. »

« Yo yommee waa Angá ? Ulob tímer. »

Nagaanol min añoulol mee eeno peepe. Angá narogool, bare ibabaj gapinoor gan icamene ukaan min ubohaalool. Ho be éjo'ol bunak baliñer tiñ bu marem taahe.

Neeni ucamencamen ejogool, nuwoogul Játo ho ájuh mee ápuren gasiin gammee nu ho. Bare agaanut Jígoosoor gasiin gaagu neeni gúpur ho be ecet.

Jígoosoor nasomben nátiij to erok Ira, úyiit báyiit min taariya nuwoogulomool maareer maa.

Nan guwoogulo mee Játo jaram átiijul, Angá narogool : « Umu son arañool gulalenorulo gútiijul taahe, narem dóoru, nalañoor éjinne. Bare ho be éjo'ol bu marem taahe. Neeni átiijul ásit bu marem, núñag ujok gasiin gaagu uñak. Ho be ebaañ akaan an. Neeni ukaanutaal maa, akoña he abiiit bóot. Búyiraak be naliigoorulaam mee to nak ajumpor narem. Ñeer aw be ekoopool taahe. Elí be nogen bu baaba. Nanoonan an néjo'ol aw be ejam fúrusool. Ho be épuruli n'gañeni gárib. »

Nan bunak buliņ mee tiņ, nátiņul. Nakaan nan  
ámimir, bare sehutool. Nabaj ajantilenoor. Nak  
awong bu marem náraahulo min ajegoor.  
Búfaatenool nahakili min arem.



Aṅar guñenool narem maa, nátuuho ayah cob jandiṅ ho bu gáraahulo bu gajegoor.





Játo nátiij búñag saaw ajok dó n'gasiin gaagu gík. Gasiin gaagu ngútiij népur, guloh dó nu mal. Ahañeñaab nacamen gabohoor be ejogúl gasiin gaagu, Jato najok guñen akuum.



Ahajeñaab nalloh acet. Játo narok : « Injé mbil irok akoña he buu ? Gurogotom imugi iñagi gasiini déhooro aw nucet. »

Angá nan ajam mee gawel gara mal maamu bújuk-bújuk, bújuk-bújuk, nínif yem. Narok akoña aahu ujaal uyuugenaal nínif mee.



Nan gujoonoorool mee, Játo nayuho añeeriił súii mara ho ajogut arok jamuk ngorogool. Tooge Angá ámimir arok gasiin gaagu neeni guñagoe ho be ecet.

Nátiij gasokenool : « Gasiin gaagu ugéy ? Buu nkaanool ? Akoña aahu araanool acacet. »

Játo narok Jígoosoor : « Icameenut jamugool. Gasiin gaagu niñage, déhooro naloh acet. »



Ñeer nan gúyinen mara acecet, nguteb gufok.  
Ngúbaañul be elob mara bacaam baabu.

Jígoosoor narogiil : « Injé ihaajout fubaj.  
Araañom nihaajoe. Jiñeer ájuh mee añar fo  
m'buguul. Mara, fubaj faafu, hanur ájuhe añar  
fo. Mara ja guroñool nalobe fubajool jambil  
fugaboori. Anooan agaboor fo, ho be ecet nañ  
min ho acet mee nogoor. Teer ínje ibiit bóot  
bajoorut son araañom. »

Jígoosoor najow ariiñen gara karamba akahiil  
to.

Ñeer ubuge gammee gúfaajiir. Angá, Ira, Játo  
ay abil mee enar fubaj faafu. Mara nañ lehen  
Ira, mat guñoeenool. Angá may nañ lehen ho,  
mat ban acet. Jato ho añaak mee gasiin gaagu.

***Ay abil mee añar fubaj faafu ?***